

Ceist 4 ‘...bhí...’

1. Féach ar an mír arís agus breac síos gach briathar a chloiseann tú atá san aimsir chaite. Má tá an briathar céanna luaite níos mó ná uair amháin ní gá é a bhreacadh síos gach uair.
2. Scríobh amach na ceisteanna agus na freagraí (dearfacha agus diúltacha) a ghabhann leis na briathra seo a leanas san aimsir chaite:

tosaigh, éirigh, cuir

3. Cum ceisteanna leis na briathra thuas le cur ar an duine in aice leat.

Ceist 5 ‘...údair...’

Cad é iolra na n-ainmfhocal seo a leanas?

buachaill –
leabhar –
scoil –
bliain –
seif –
tuismitheoir –
lucharachán –

Ceist 6 Pléigh an cheist seo leis an duine in aice leat.

Cad a tharlaíonn do Jingles agus í ag obair le Daidí na Nollag, dar libh?

Insígí bhur scéal don rang.

Treoracha agus Freagraí

Ceist 1

1. *éacht, gaisce* - achievement
2. *dianghlasáil* - lockdown
3. *ar an margadh* - on the market
4. *comhlacht foilsitheoireachta* - publishing company
5. *lucharachán* - elf
6. *an Mol Thuaidh* - the North Pole
7. *fíorbhródúil* - extremely proud
8. *mian* - wish, desire
9. *luaite* - mentioned
10. *beidh ríméad orm* - I'll be delighted

Ceist 2

Is cleachtadh cainte é seo. Tabhair deis do na foghlaimeoirí an méid a thuig siad faoin mír a phlé le chéile. Pléigh ábhar na míre leis an rang iomlán ansin.

Ceist 3

Féach an script.

Ceist 4

Briathra sa script: *thosaigh, bhí, a tháinig, a phioc.*

Ar thosaigh....? Thosaigh / Níor thosaigh

Ar éirigh....? D'éirigh / Níor éirigh

Ar chuir...? Chuir / Níor chuir

Ceist 5

buachaill – buachaillí

leabhar – leabhair

scoil – scoileanna

bliain – blianta

seif – seilfeanna

tuismitheoir – tuismitheoirí

lucharachán – lucharacháin

Ceist 6

Is féidir gach beirt a chur ag déanamh an phlé seo agus ansin tuairimí gach péire a phlé leis an rang iomlán.

Siún Nic Gearailt

Tá éacht á baint amach ag buachaill óg dhá bhliain déag d'aois as Conamara mar dhuine de na húdair is óige riamh sa tír chun leabhar a fhoilsiú. Le linn na dianghlasála, thosnaigh¹ Jeaic Breathnach ag scríobh leabhar dar teideal *Jingles Christmas Adventure*, atá anois ar an margadh.

Aodhán Ó Maoileoin

Dhá bhliain déag d'aois atá Jeaic Breathnach agus tá se i rang a sé i Scoil Sailearna in Indreabhán i gContae na Gaillimhe. D'éirigh le Jeaic a chéad leabhar a scríobh le linn na dianghlasála agus tá sé curtha i gcló anois ag an gcomhlacht foilsitheoireachta *Tribes Press*. Bhí suim i gcónaí ag Jeaic a bheith ag léamh ó bhí sé óg agus thosaigh sé ag cur smaointe i leabhar nótaí an t-am seo anuraidh faoin lucharachán ar an tseilf nó *elf on the shelf* a bhíodh ag spraoi ina theach. Agus is as sin a tháinig an leabhar *Jingles Christmas Adventure*.

Jeaic Breathnach, Údar *Jingles Christmas Adventure*

An chéad uair a phioc mé suas leabhar, bhí suim agam sa scríobh. Bhí mé ag léamh leabhair ar nós Roald Dahl, agus David Walliams agus JK Rowling. Agus bhí mé ag iarraidh a bheith i m'údar. Tá sé faoi *elf* agus an t-ainm atá uirthi ná *Jingles* agus lá amháin glaonn Saintí uirthi le haghaidh jab fánach a dhéanamh agus tarlaíonn rud éigint² uafásach ar an Mol Thuaidh agus ... caithfidh tú fáil amach!

Aodhán Ó Maoileoin

Tá a thuismitheoirí Eithne agus Eoin thar a bheith bródúil as an ngaisce atá déanta ag an údar óg.

Eithne Nic Enrí, Máthair Jeaic

Táimid thar a bheith sásta. Tá suim curtha sa leabhar ag na siopaí móra i nGaillimh agus is rud iontach é sin go háirithe d'údar chomh hóg. Níl Jeaic ach dó dhéag agus tá an leabhar anois le fáil in *Dubrays* i nGaillimh, tá sé in *Charlie Byrne's*, tá sé in *Kennys Bookshop* i nGaillimh agus táimid i mbun cainte le *Easons* faoi láthair freisin. Le cúnamh Dé beidh sé istigh ansin agus is iontach an rud é go bhfuil an oiread sin suime curtha ag na siopaí móra sa leabhar. Táimid fíorbhródúil, mar a dúirt mé.

Aodhán Ó Maoileoin

Níl ach mian amháin ag Jeaic an Nollaig seo – go mbeidh a leabhar luaite ar an *Late Late Toy Show* ar an Aoine.

Jeaic Breathnach, Údar *Jingles Christmas Adventure*

Thiomáin mo dhaide³ go pearsanta go dtí RTÉ ag an deireadh seachtaine agus bhí an leabhar ina lámh aige agus tá súil agam go mbeidh an leabhar ar an *Late Late Toy Show*. Beidh sé sin iontach, beidh ríméad orm.

Aodhán Ó Maoileoin, Nuacht TG4.

¹ *tosaigh* an leagan caighdeánach

² *éigin* an leagan caighdeánach

³ *daidí* an leagan caighdeánach